


# ALAHADY - KAREMY 3 - TAONA A 2023



## MAHATOKY ANDRIAMANITRA

Ry Kristianina havana, manomboka amin'izao Alahady fahatelon'ny karemy izao dia ny Evanjely nosoratan'i Md Joany no vakintsika isan'Alahady fa indrindra ireo Evanjely izay famantarana mifandray akaiky amin'ny batemy. Handinika bebe kokoa mikasika ny batemy

Vakiteny I : Eks. 17, 3-7

Tononkira : Sal. 94,

Vakiteny II : Rôm. 5, 1-2, 5-8

Evanjely : Jo. 4, 5-42

isika manomboka izao. Inona ny antony? Ny Paka no loharano sy fototra ny fiainantsika kristianina ka ny batemy no Paka ho antsika. Izany hoe fandalovana isika, miala amin'ny fahafatesana miditra amin'ny fiainana. Araka izany ny Alahady fahatelo sy fahaefatra ary fahadimy dia handinihantsika ireo famantarana ao

amin'ny Evanjelin'I Md Joany izay ahitana ny fanazavana ataon'i Jesoa mikasika an'ireo famantarana ireo. Aoka àry hitamberina ao an-tsaintsika ny Sinaody tapany voalohany izay nandinihantsika ny FIANAKAVIANA EGLIZY KELY MIARA-MIVAVAKA, MANDALINA NY FINOANA ka anisan'ny sakramenta lehibe nasongadintsika ny Batemy.

Amin'ity Alahady fahatelo ity dia ny famantarana mikasika ny rano no resahina, izany hoe ny fihaonan'i Jesoa tamin'ilay vehivavy Samaritana. Mangetaheta tokoa isika, mangetaheta famonjena nentin'i Kristy. Ho hitantsika amin'ireo famantarana hatramin'ny Alahady fahadimin'ny karemy ireo fa miara-dalana amintsika tokoa i Jesoa, miara-belona amintsika tokoa i Jesoa ka manala an'izay rehetra mandrakotra ny fiainantsika ka mitondra antsika amin'ny tena fiainana. Koa anjarantsika ny mandray Azy. Raha mandray Azy isika dia mahazo

fahasoavana ary ho feno hafaliana. Ny hahafantarana fa nandray fahasoavana isika dia tsy mitana samirery ho antsika ny hafaliana vokatry ny fahasoavana fa manambara azy amin'ny manodidina . Matetika isika tsy mahafantatra ka manontany raha tena votom-pinoana isika?

Raha isika mandray sy manome dia manambara izany finoana izany amin'ny alalan'ny fahafoizana, fanompoana, faharetana satria izany ny Vaovao Mahafaly nentin'i Kristy.

Ny Tenin'Andriamanitra aroson'ny Eglisy amin'izao Alahady fahatelo izao dia manambara fa efa manakaiky ny fiakarana eny an-tendrombohitra, manao pelerinajy, fivahinianana masina isika. Ho antsika eto Antsiranana moa dia ny fanaovana ny pelerinajy eny amin'ny "montagne de francais" izay hibanjinantsika an'i Jesoa mpiara-belona amintsika ka hiakatra eny an-tendrombohitra. Ary dia hiova fo tokoa isika ho zary Tabernakla velona, mitondra an'i Jesoa eo anivon'ny tanànantsika ka hizara ny fahasoavana eo anivon'ny fiaraha-monina misy antsika. Nolazaintsika tamin'ny alahady lasa teo raha nandinika ny fiovan-tarehy isika fa io fiovan-tarehy io no tanjona tian'i Jesoa ho an'izay manara-dia Azy. Tiany hiakatra ny fiainantsika fa tsy hirefarefa. Mitaky dingam-piainana avy amintsika izany. Izany no ataontsika amin'izao Sinaody izao ary hiainantsika amin'izao Karemy izao. Azo lazaina àry fa tahaka ilay vehivavy Samaritanina ao amin'ny Evanjely isika. Eo anivontsika i Jesoa. Miara-dalana amintsika izy kanefa tsy fantatsika. Azo lazaina fa tena manao Sinaody miaraka Aminy isika.

Henontsika tao amin'ny Evanjely fa nandeha nantsaka ilay vehivavy Samaritanina. Isika koa mangetaheta.

Mangetaheta ny famindrampon'Andriamanitra izao andro iainantsika izao, izany no voalaza ao amin'ny vakiteny voalohany "*Tamin'izany andro izany dia main'ny hetaheta ny vahoaka, ka nimonomonona tamin'i Môizy nanao hoe: "Ahoana no nampiakaranao anay hiala tany Ejpta, hahafatin'ny hetaheta anay sy ny zanakay mbamin'ny bibinay?"*

Mitranga amin'ny fiainantsika ankehitriny koa izany, rehefa tojo zavatra manahirana isika dia mitady hanome tsiny an'Andriamanitra, mahatoky anefa Izy Andriamanitra ka tsy mivadika amin'ny dinam-pitiavany. Raha nimonomonona ny vahoaka dia nomen'Andriamanitra rano velona ary tandindon'i Jesoa io rano velona io, Izy ilay rano mamelona antsika amin'ny Paka, ilay hanaovana batemy antsika ka hahazoantsika ilay ain'Andriamanitra." *Fa indro Aho hitsangana eo anoloanao ao amin'ny vatolampy izay any Hôreba; hikapoka ny vatolampy ianao; dia hivoaka ny rano ary hisotro ny vahoaka".*

Io ny tantaran'I Masa sy Meriba izay nolazaina fa naka fanahy ny Tompo Andriamanitra nefo eo afovoan' izy ireo tokoa ny Tompo "*Nataon'i Môizy teo anatrehan'ny loholon'i Israely izany, ary nomeny anarana hoe: Masah sy Meribah io fitoerana io, fa nila kisa ny zanak'i Israely, sy naka fanahy ny Tompo nanao hoe: "Eto afovoantsika va ny Tompo sa tsia?"*

Anjarantsika izany no misafidy : hahita ny Tompo eo amin'ny fiainantsika, izany no lazain'i Md Paoly ao amin'ny vakiteny faharoa (Rôm. 5, 1-2, 5-8 ) efa eo amintsika tokoa ny Fanahin'Andriamanitra satria niaraka amin'izany dia nomena antsika ny fitiavana. Io no rano velona mameleona ny fiainantsika. Raha lavitra ny fitiavana dia maty ny fiainantsika. Hitantsika izany eo amin'ny korontana maro isan-karazany eran'izao tontolo izao, eo amin'ny fiainantsika andavanandro, eo amin'ny fianakavantsika, eo amin'ny tontolo iainantsika. Very manko ilay endrik'Andriamanitra nahariana antsika. Raiso àry ny Fanahy Masina, hararaoty izao vanim-potoan'ny karemy izao mba hihavaozantsika tokoa. Mihavana re amin'Andriamanitra satria raha miavana Aminy isika dia karakarainy. Arotsany ao amintsika ny Fanahy Masina izay mamerina amintsika indray ny tena fitiavana araka ny naharian'Andriamanitra antsika tamin'ny voalohany. I Jesoa mpiara-belona amintsika ka raiso ny sakramentan'ny famindram-pon'Andriamanitra, hararaoty izao fotoana izao dia hiova ny fontsika ka hitoetra eo amin'ny fiainantsika tokoa ny fitiavan'Andriamanitra. Miaraka amin'ny fitiavan'Andriamanitra ny fanantenana, tsy mba manodoka na mamitaka io fanantenana io. Raha ao amintsika tokoa ny fitiavan'Andriamanitra dia ho lavitra antsika ny ratsy, tsy hifamono isika fa hifanao soa ka hikatsaka ny soa iombonana. Vonona hiaro sy hikolokolo indray ny Tranoben'Andriamanitra efa tena robaka ankehitriny.

Io no azo amintinana ny Evanjely mitantara ny fihaonan'i JESOA tamin'ny vehivavy Samaritana. Vizana I Jesoa ka nanatona ilay vovo fantsakana rano tao amin'ny tanànan'i Sikara. Matoa i Md Joany namaritra ny ora sy ny toerana dia misy dikany lehibe io fihaonan'i Jesoa tamin'ilay vehivavy Samaritana io, izay nanambarany ny momba Azy hoe *izy Jesoa no rano velona, izy no mesia*. Azo lazaina fa fandalinam-pinoana no ataon'i Jesoa eto, taritiny tsikelikely ilay vehivavy mba hahatsapa fa Izy tokoa no tena famonjena.

Izany no ataon'i Jesoa amintsika isaky ny mamaky baiboly isika, "inty ny zanako malalako henoy izy" hoy ny Evanjely tamin'ny Alahady lasa teo. Isaky ny mihaino ny Tenin'i Jesoa isika dia mampianatra Izy, raha mba "fantatrao manko ny fanomezan'Andriamanitra ?". Raha mba fantatsika izany fanomezana izany dia isika no hihazakazaka hanatona an'i Jesoa, izany no nataon'ilay vehivavy Samaritana. Mampianatra antsika tsikelikely i Jesoa ary dia ambarany amintsika ny marina. Izany ny ezaka ataontsika amin'izao Sinaody izao ka hararaoty ny fifampitraofana iarahantsika manao. Hararaoty izao karemy izao. Rehefa mihaona amin'i Jesoa isika, mifanojo Aminy dia ho fantantsika ny marina ka miova ny fiainantsika.

Izany no niseho tamin'ity fihaonan'I Jesoa tamin'ilay vehivavy samaritanina ity, nambarany an'ity vehivavy Samaritana ity ny ati-panahin'ny fiainany. Izany no mampiova antsika rehefa miaiky ny fahotantsika isika. Matoa isika tsy miova dia tsy manana fanetren-tena, mbola miavonavona isika, tsy manaiky hampianarin'i Jesoa. Nampianarin'i Jesoa ilay vehivavy ka niaiky ny fahalemeny tamim-panetren-tena. Raha miaiky ny halementsika ao anatin'ny fanetren-tena isika fa indrindra amin'izao vanim-potoanan'ny karemy izao dia hiova ny

fiainantsika tahaka an'ilay vehivavy samaritana. Izy ihany koa no nanambara amin'ireo mpiara-belona aminy izay nandray an'i Jesoa ihany koa. Izany no antenaintsika amin'izao karemy izao. Izany no antenaintsika amin'izao Sinaody izao. Ny diosezintsika manontolo manomboka amin'ny fianakaviana Eglizy kely no handray an'i Jesoa. Raha mandray Azy isika tahaka ny nataon'ny Samaritanina dia hiova ny fiainantsika, hihavao isika ary ho sahy hangataka amin'I JESOA aza hoe : "mitoera ety aminay".

Marina tokoa fa i Jesoa mitoetra eto amintsika no famonjena. Aza gaga isika raha misy mitady hanilikilika na dia eo anivon'ny eglizy misy antsika aza, henontsika tamin'ny Evanjely teo, ireo mpianatra dia mitady hanome tsiny an'i Jesoa noho izy miresaka amin'ilay vehivavy. Voan'ny fakam-panahy izy ireo ka te hitazona an'i Jesoa ho azy ireo samirery, sanatria izany fa indrindra amin'izao fiomanantsika amin'ny Paka izao. Aoka isika tsy hanana fakam-panahy toy ny an'ireo apostoly ireo, aoka isika ho vonona hizara an'i Jesoa amin'ny hafa. Ambaran'i Jesoa fa ny fototry ny fiainantsika manontolo dia ny hanatanteraka ny sitrapon'ny Ray. Raha manatanteraka izany isika dia fantaro fa hiova ho tsara ny fiainantsika ka hanambara an'i Jesoa amin'ny hafa ary ireo hafa ireo no hanambara am-pahibemaso tahaka ny nataon'ireo vahoaka tamin'ilay vehivavy : *tsy noho ny filazanao intsony fa ny sofinay no nandre.*

Enga anie isika tsirairay avy amin'izao fiomanantsika amin'ny Paka izao, amin'izao ADY sady DIA izao, ary amin'ny Sinaody iarahantsika manao izao hanaiky fa I Jesoa dia miara-dalana amintsika na dia amin'izao fahasahirana mafy manjo antsika : mangetaheta tahaka an'ilay vehivavy Samaritanina isika, na dia eo aza ireny fomba mahazatra mila mitady hiraikitra tahaka ny nanjo an'ilay Vehvavy Samaritanina dia ho afaka hiova isika satria nampianarin'i Jesoa. Aoka àry ho vonona ampianariny isika amin'izao karemy izao, amin'izao sinaody izao. Aoka ho fianakaviana Eglizy kely tokoa isika, mivavaka, mandalim-pinoana, miaro ny tontolo iainana dia ho Paka sambatra tokoa ity Paka 2023 ity. Samy hahatsapa isika tsiraikiraiky fa nandre fa i Jesoa tokoa no mpamonjy. Raha Izy no mpamonjy dia dioviny ny fontsika ka hirehidrehitra fahamarinana sy fihavanana, ilay fihavanana sady kristianina no malagasy, amin'izay dia hampanjaka ny rariny sy ny hitsiny, ny fihavanana tena izy, ny fifankatiavana ka dia hihavao ny fiainantsika.

Ry Masina Maria Reny ampianaro izahay hahay hihaino an'i Jesoa ka hihavao, ho zary Tabernakla velona tahaka anao, hitondra Azy eo amin'ny mpiara-belona. Haka tahka an'ilay vehivavy samaritana anie izahay ka hanambara amin'ny manodidina ary izy ireo koa ho afamilaza hoe : "*Tsy noho ny filazanao intsony no inoanay fa ny tenanay no nandre, ka fantatray fa Izy tokoa no Mpamonjy ny olona*". Amen

Mompera Arseveka Mgr Benjamin Ramaroson